

POLITICONAN Y GOBERNANTENAN TA DIVULGA 1/4 DI INFORMACION

Ultimo dianan mi a sinta scucha algun declaracion cu a sali for di mundo politico, y mi ta puntra: **"Pakico ta menciona na grandi, solamente un cuarto di e informacion, y no ta duna e pueblo e 3/4 restante tambe?"**

E siman tras di lomba mi a sigui declaracionnan di nos prome ministro cu a muestra cu den Gobierno tin hopi hende cu ta cobra, sin cu nan ta traha.

E disco aki a wordo toca na varios ocasion caba y ta na punto di bira **"disco rayao"**.

E pueblo kier sa: cuanto e trahadornan publico, ambtenaarnan aki, trahadornan den empresanan priva di gobierno, ta ?

Den cual departamento nan ta, y cuanto den cada un di e departamentonan?

Cuanto placa ta ser paga pa luna en total na esnan cu no ta traha? Pakico nan no ta trahando?

Desde ki tempo ta conoci cu nan no ta trahando?

Pakico ta papia di e topico aki, mientras cu deber di gobierno ta pa tuma medida y no djies menciona **"den laira"** cu tin cantidad di hende cu ta cobra sin traha?

Ta grita, yora, sapatea riba **"no tin placa"** pero ta nos gobernantenan mes ta permiti pa placa bay tira afo manera ta for di mata di kwihi placa ta cay.

Ta nos gobernantenan y politiconan, no di awor pero pa añanan largo caba tin miedo tin tuma medida y pone pia abao.

Si, mi a menciona **MIEDO**, pasobra nan tin miedo di perde voto, miedo di trapa pia di conocinan y familianan, miedo di malcontento den e pueblo, miedo di comerciantenan, miedo di sindicatonan, miedo di casonan dilanti huez.

E miedo ultimo aki ta pa motibo cu tin tanto buraco den leynan, y tambe leynan cu nunca a wordo ahusta, cu ta pone cu **"gobierno no por gana"** pa motibo di negligencia di **"gobierno mes"**.

CUANTO ASUNTO NO TA SER NEGLISHA

Pa añanan largo comunidad ta keha di problema di **NIGHTCLUB-NAN** bao di capa di Take Away, mey mey di barionan.

Na Socotoro un di nan a bira **CLUB PUBLICO** y cu no tin ningun hende ni ley pa para esaki.

Fin di siman, habitantenan no por drumi, y awor hasta bandanan musical live ta toca for di tempran y te laat den madrugada.

CENTENARES di keho tin di esaki na autoridadnan, pa mi exagera un poco cu e cantidad.

NINGUN hende ni **AUTORIDAD** por haci algo pasobra e vergunning **duna** ta permiti esaki. No por haci nada pasobra **"tal politico"** tin un **man den e asunto** aki. Pasobra **"ministro"** tin friend, of cierto polis tin friend, of cierto politico tin friend, cierto coordinador tin friend etc. **cu nunca** : go ta ser haci pa esnan cu ta sufri.

Tin di e establecimentonan aki cu ta saca musica te riba caya, **drentando** cas di hende den barionan, y no tin medida pa tuma pa evita pa e sonido keda den e establecimiento so.

Si tin medida pa tuma, ta depende con ta interpreta esaki y pa kende ta interpreta e medida y pa kendenan o ki tipo di establecimiento no. Ningun politico o gobernante no por bisa cu nan no sa di e problemanan aki.

Ta traha no ta traha na bienestar di e pueblo (votador).

Ta cantidad di problema di PUEBLO tin pa wordo atendi, pero no ta haci nada.

Pakico ?

Na Bushiri complex tin probelma continuamente di un bisifia cu tin bida di otro bisifianan na lifa pa explota.

Polis ta ser yama continuamente y ta ser splica cu e situacion ta explosivo y cu un dia... si un dia e bom ta rementa.

Polis no ta actua pasobra **"no ta caso di prioridad. Si actua mes, ta yega na "nos no por haci y no tin ley pa para esaki"**.

Ta unda nos trahadornan di ley a keda anto, nan ta den exterior atrobe?

Awendia no ta gobernantenan so, pero hasta oposicion a bira turistanan, biahero primera clase.

E tendencia politico nobo cu ta: **"oposicion cu ta hunga papel di ta mas gobernante cu e gobernantenan mes"**, ta biaha rond mundo, mientras cu durante nan **"vacasion"** na Aruba no ta cumpli cu nan tarea parlamentario y ta ausente keto bay di reunionnan

parlamentario.

Ta e partidonan cu un of dos asiento, cu ta mes representante di pueblo, ta wordo primi, siendo cu nan si ta cumpliendo cu nan tareanan di oposicion y di parlamentarionan.

Awor ta busca otro polemica cu ta e asunto di pensioen.

NO TA MENCIONA PENSIOEN DI PARLAMENTARIONAN NI DI MINISTRONAN

Ta scucha e siman aki cu mester di reforma asunto di pensioen.

Ta pensa riba aumenta edad di esnan cu por ricibi pensioen.

Ta papia di rapportnan cu ta menciona e problemanan aki.

Ministro ta yora di cambionan cu mester haci cu pensioen di empleadonan publico y di otro nan. Pero **"no ta menciona ki dia lo cambia ley di pensioen di parlamentarionan"**.

No ta bisa cu mester aumenta edad di pensioen di parlamentario di 50 pa 60 aña.

Ta keda keto riba esaki.

For di 1986 hopi parlamentario y ministro a baha cu pensioen cu 45 of 50 aña di edad.

Ministro por baha cu pensioen cu 45 aña di edad.

Pakico no ta menciona cu **"lo bay aumenta e edad pa ministro baha cu pensioen, pa 60 ?"**

Nan mag baha cu pensioen cu 45 of 50 aña (ministro of parlamentario) mag sigui traha, cobra pensioen apart.

No ta menciona ki dia lo kita e **"Overbruggingstoelage"**, e beneficio di transicion.

E placa cu cada parlamentario ta sigui cobra despues cu nan baha como parlamentario, cobrando 80 % di nan salario di parlamentario 1 aña largo, of cobra e totalidad den un paga cash mesora.

Esaki si e pueblo no mag tende ora ta papia di reforma sistema di pensioen.

No ta bisa cu lo kita e **"overbruggingstoelage"** o reduci esaki te 20 % cu ainda ta hopi mas cu mayoria di hende ta cobra na Aruba pa luna.

No sa menciona cu lo tuma medida riba o ahusta ningun decision tuma den madrugada ora tur hende ta drumi, y cu ta trata decisionnan cu ta beneficia parlamentarionan y ministronan.

Tin e afamado **"Rapport Fowler"** pero ya ta varios aña cu ningun ministro o parlamentario kier mishi cu e rapport aki cu ta helijm den nan latchi di lesenaar.

A usa si parti di e rapport aki, pero solamente pa locual ta beneficia politiconan, pero ningun hende kier pa e rapport aki wordo trata.

For di 1986 ta tende tur gobernante bisa cu lo cambia ley, pero ningun hende ta mishi cune pa no mishi cu ministronan y parlamentarionan.

Tur ministro cu excepcion di Booshi y Marisol ta cobrando caba pensioen apart como ministro y pensioen apart como parlamentario.

Nan a ricibiendo caba sin cu nan mester traha un suma astronomico na pensioen pasobra nan a pasa 45 y 50 aña di edad y ademas e salario cu nan ta cobra tur luna actualmente y despues e overbruggingstoelage tambe ta bin cay aden **"cash"**.

Pa dia cu tur di nan baha pa otro gobernacion, nan no tin nada di preocupa pasobra nan lo tin dos pensioen sigura, cu tur otro beneficio y lo ta cobrando sin traha mes, kizas mas cu nan ta cobrando awendia como salario.

Esaki ta locual gobernantenan no ta papia di dje ora cu nan kier **"hinca man"** den cartera di pueblo.

KENDE TA DICIDI GOBIERNO O OPOSICION?

Riba e asunto di Status Ultraperiferico, tur hende ta puntra ultimo dianan si ta gobierno ta dicidi of si ta e partido mas grandi den oposicion. Tin biahaamento rond mundo pa loco, kizas pa complace brothernan di partido hulandes, pa pusha Aruba den e status nobo. Mañan ta politica ta hunga dia tras dia cu e asunto aki, di **kende a logra kico, kende a haci kico, kende no a haci nada etc.** Esey ta tras di e biahamentonan aki.

Ta preparacion pa campaña 2004 ta tumando lugar y e status nobo aki lo hunga papel pisa di **"ken di, ken a bisa y ken a logra"**. Pesey mi a goza e comentario di Booshi Wever publica awe den pagina 6. **Bisa e cos manera e ta, y no sconde.**

July Naar